

Varakļonūs beja divi magazejas klētis : vīna Elksņu krūgā apmāram 5 ^m klēti, nu Varakļonim pa ceļam uz Vydsmuižu, tei beja mozōka klēts, tyka saukta Brangovas nūvoda klēts. Ūtra beja lela, calta nu akminim, apmāram divi *knajru* Varakļonim uz Stērnīnes ceļa, saukta Oltyuža nūvoda magazejas klēts, Varakļonu un Stērnīnes lelceļa dīnvydu pusē, nu Varakļonim braucūt uz Stērnīni pa kreisi.

Magazejas klēts vajadzeiba ir rodusēs aiz tō īmesļa, ka zemnikim dažus godus pavasarī ir pītryucis labeibas, ar kū apsēt teirus, jo uznōce naražas godi plyudu voi sausuma dēļ. Tod rodusēs dūma, ka lobōkajūs godūs ir jōkrōj labeiba dēļ naražas godim, bet radīs jautōjums, kur labeibu uzglōbēt. Tam nūlyukam par dereigu atzynuši ceļt lelu myura klēti, kas byutu drūša nu guņsgrāka un kur varātu sabērt daudz labeibas, kas varātu stōvēt vairōkus godus. Varakļonu magazejas klēts cālōjs beja Donots Cakuls, dzimis 1865. goda janvarī Cakulu sādžā. Jys ir bejis gimīnē ūtrais pēc vacuma, jam ir bejuši vēl četri brōli un divi mōsas. Tāvs un vacōkāis dāls bejuši dzārōji un gimīne dzeivōjuse tryukumā. Donots ar vacōkū brōli Jōni gōjuši uz Varakļonu mīstu žeidim molkas grīztu un tai peļņējušis. Donots savu nūpeļneitū naudu atdevis mōtei, bet Jōns savu daļu nūdžēris krūgā kūpā ar tāvu. Alōk tāvs pīkōvis mōti, lai atdūtu Donota nūpeļneitū naudu, bet mōte nadavuse. Mōte, dāla Donota pamudynōta, aizgōjuse pi pogosta vacōkō un lyuguse tāvu atceļt nu saimisteibas vadeišonas, aiz tō īmesļa, ka tāvs ar dālu obi dzardami izputynōjuši saimisteibu. Pogosta vacōkāis šū lyugumū izklausējis un saimisteibas vadeišonu nūdevis mōtes rūkōs kūpā ar dālu Donotu. [Aiz tāva nūlaideibas un dzeršonas Donotam nav bejis īspējams kōrteigi apmeklēt pogosta skūlu, jo ir vajadzējis strōdēt sātā un peļneit uzturu gimīnei. Tōpēc Donots skūlu beja apmeklējis tikai napylnas divi zīmas, bet ir bejis apdōvynōts un lūti centeigs. Donots uzajēmis Varakļonu mīstēnā mōju remontu dorbus, tai īpeļņējis naudu un ticis uz prišku. Kod magazejas klēts ceļšona gōjuse uz izsūleišonu - uz mozōk sūleišonu, tod tū nūsūlējis Donots Cakuls. Tur ir bejuse vajadzeiga drūšeibas nauda, kas sagōdōta ar pogosta vacōkō paleidzeibu.

Magazejas klēts calta Donota Cakula vadeibā ap 1886.-1888. godu. Par magazejas klēts uzceļšonu Donots Cakuls nūpeļņējis 300 rubļu un par šū naudu Varakļonu mīstēnā tērga laukumā nūpērcis veikala telpas un atvēris veikalu, kas beja vīns nu pyrmajim latvīšu veikalim Varakļonūs. Tamā pat laikā Donots Cakuls ir uzcēlis pi Varakļonu bazneicas lelu kūka mōju, kuras vīnā golā beja, nabogi, bet ūtrajā golā dzeivōja ērgelņiks. Donots Cakuls ir uzskotams par pyrmū byunīceibas uzjēmēju Varakļonūs un tōpēc jam ir sovi nūpalni pi Varakļonu saimnīcyskōs uzplaukšonas.

Pi šō roksta sastōdeišonas izpaleidzēja Stanislavs Cakuls.